

P E T I T I O N

OF

TE TEIRA AND OTHER NATIVES RESPECTING THE RELINQUISHMENT OF WAITARA.

Waitara, Oketopa 21, 1863.

E nga tino upoko o nga Runanga Pakeha,—

Tena koutou te mahi ana i nga mahi o te raruraru o tenei motu o Niu Tireni. E hoa ma, e kimi kau ana au i te take o Waitara i wetekia ai. He papaku pea no te wai, ina hoki ka tangohia nga tangata tiaki o te waka; kahore au i te mohio. Ko tenei, ka noho tonu to matou kupu i raro i te mana of Kuini Wikitoria, tae noa ki te tuturutanga o ta matou whakaetanga ki to matou whenua ki Waitara ki a te Kuini. Ko te Kuini hei tami i nga waka, kei pakaru i te ra; kia takoto ora ai i tona takotoranga. Ko ta matou kupu tena, e te Runanga o nga Pakeha. E hoa ma, e nga tangata o te Runanga, ko ta matou i karanga ai, kia whakawakia a Waitara. I mea mai a Kawana Paraone, Me whakawa a Waitara. Pena tonu te kupu a te Pokiha, a te Pihopa, a Kawana Kerei hoki, i tana taenga mai ki konei. A, kahore matou i kite i te whakawakanga; engari i whakahokia poupoureretia mai a Waitara kia matou. Kua kitea pea e te Kawana raua ko te Pere te he o Te Teira, me te tika o Wiremu Kingi; koia matou i pai ai kia kitea hoki e te tokomaha. Koia i mea ai matou, me whakawa a Waitara; haunga te whakawa i roto i te ruma o tetahi tangata, o te Pere ranei, o wai ranei, etoru pea nga tangata ki roto. He korero titaha tena kia maua. Engari te whakawa nui, kia rongu ai te tokomaha. E hoa ma, e te Runanga nui o te Kuini, ma koutou e whakamana i a matou kupu nei, no te mea he tangata au no te Kuini, he tangata hoki koutou no te Kuini ano.

Ko ta matou whakaaro ano tenei, kia whakawakia a Waitara. Otira, chara hoki i a matou taua kupu kia whakawakia; na Tamehana ke taua kupu; he whakaae kau ta matou. Ka tatari nei matou i taua takiwa kia tae mai a Kawana Kerei ki konei, kia whakawakia ano a Waitara. No te taenga mai o Kawana Kerei ki konei, kahore i whakawakia; a ka rokohina nei e te matenga o nga Pakeha ki Wairau; na, ko te tukunga mai tena i Waitara ki a matou. Kaore matou i mohio ki te take i tukua mai ai; kaore matou i tono atu kia tukua mai; a e rapu nei ano matou ki te take i tukua mai ai a Waitara. Otia i rongu pu atu ano matou ki nga kupu a te Pere raua ko te Kawana, i mea, ko te take i mahue ai a Waitara, ekore e tika kia pana nga tangata kua noho ki runga ki te oneone i runga i te rangi-marie, ara, a Wiremu Kingi. Ka mea atu matou ki a te Kawana, E hoa, e te Kawana, he hoiho noku te hoiho, ko tetahi tangata i peke mai ki runga, ehara i a ia taua hoiho. Ka kite au i taku hoiho me taua tangata ano i runga, ka mau taku ringa ki te paraire, ka mea atu au ki taua tangata, E hoa, e rere ki raro, tukua mai taku hoiho kia hokona. Na, ko taua kupu nei mo Waitara. Ko taua hoiho ko Waitara; ko Te Teira te tangata nona taua pihi; ko Wiremu Kingi, he pokanoa tana ki te noho i runga. Koia i kore ai e tika taua kupu a te Pere raua ko te Kawana.

Ko tenei, e te Runanga o nga Pakeha, kaore o matou whakaaro ke atu. Kotahi tonu to matou whakaaro, ko Waitara kia riro atu i te Pakeha.

Ko o matou ingoa enei ka oti nei te tuhituhi :—

*Te Teira,
*Paranihi,
*Hemi,
*Tamati Raru,
*Wi Nga Waka,
*Rewiri,
*Eruera,
*Epiha,
*Ropoama,
*Hita,
*Ropoama,

Karena,
Tipene Warihi,
Hoera,
Hona,
Matiaha,
Haimona,
Hori Taharoa,
*Honiana,
Piripi,
Rona,
Herewini,